

李文忠公奏稿

李文忠公奏稿

卷之五十五目錄

各軍仍請部餉摺

光緒十一年九月初五日

調李鳳苞襄辦南洋摺

光緒十一年九月初五日

雲廣電綫籌款摺

光緒十一年九月初五日

派員接辦朝鮮事務摺

光緒十一年九月二十一日

海防捐礙難歸部摺

光緒十一年九月二十一日

赴朝人員請獎摺

光緒十一年九月二十八日

奏保章洪鈞片

光緒十一年九月二十八日

續選出洋學生摺

光緒十一年十月初十日

驗收鐵甲快船摺

光緒十一年十月十八日

駕船回華人員請獎摺

光緒十一年十月十八日

貝勒璿請獎片

光緒十一年十月十八日

豫岸仍請加耗摺

光緒十一年十月十八日

附省隄河工程摺

光緒十一年十月十八日

裁遣新營停領部餉摺

光緒十一年十月二十一日

甘軍移駐鳳凰邊門摺

光緒十一年十月二十六日

改撥淮餉仍請照撥片

光緒十一年十月二十六日

曹克忠乞病摺

光緒十一年十一月十六日

津關請緩解欠款片

光緒十一年十一月十六日

東淀清理完竣摺

光緒十一年十一月二十六日

傅振邦從祀昭忠祠片

光緒十一年十一月二十六日

朝使緬徵紅稅減稅摺

光緒十一年十二月初一日

淮軍報銷摺

光緒十一年十二月十三日

軍需交涉洋務片

光緒十一年十二月十三日

更換汽機鍋爐片

光緒十一年十二月十三日

淀地分別徵糧片

光緒十一年十二月十三日

楊宗瀛總理武備學堂片

光緒十一年十二月十三日

保定設電綫片

光緒十一年十二月二十日

清理東淀請獎片

光緒十一年十二月二十日

海防練軍收支請銷冊摺

光緒十一年十二月二十日

李文忠公奏稿卷五十五

全集一之五十五

桐城吳汝綸編錄

各軍仍請部餉摺

光緒十一年九月初五日

奏爲直隸海防捐輸收款業經抵支現有水師經費無可分撥所  
需練軍及添募各軍月餉仍請由部照案分別給領恭摺仰祈  
聖鑒事竊准戶部咨開直隸練軍月餉銀四萬七千五百兩宋慶  
甫克忠周盛波添募各軍月餉銀八萬二千兩自八月起先由該  
省海防捐輸收款內撥給三箇月毋庸赴部支領等因臣查直隸  
各鎮練軍月餉向由保定練餉局經理按月派員赴部領回支發  
其海防添募克忠宋慶周盛波各軍月餉係由天津支應局按  
月派員赴部領回卽歸該局與淮軍銀錢所分別支發內應月給  
會辦北洋事宜吳大澂銀八千四百兩歸該大臣添營支發又有

提督唐仁廉總兵徐邦道添募各營亦在周盛波月餉內分撥與支應局原有水陸各軍之餉無涉以上皆專指部餉爲命脈至海防捐輸收款係奏明專抵北洋水師經費緣前議北洋購船置械創設水師經總理衙門戶部奏撥各省關釐稅迄今廣東福建釐金絲毫未解浙江湖北釐金亦久不解其餘各省關釐稅皆解不足額頻年入不敷出竭蹶萬分今年僅收銀十餘萬兩而已有之大小船艇水陸各軍及船塢船澳水雷魚雷營礮臺學堂防營電報各項月餉經費需用繁巨刻不可緩又上年軍情緊急時添購西洋雷艇鎗礮等項分批運到若不按期付價必致失信洋商不得不將本省海防捐款濟用前經奏請撥歸天津支應局略抵各省關短解北洋海防經費之數並聲明添募各軍專由部庫撥餉等因奉

旨允准欽遵在案計自第一次至第九次所收捐款已登咨明戶部撥歸支應局搭放該局庫空如洗應發水師要餉甚多隨收隨用動支無存捐輸不過一時能否常可收獲毫無把握而此後水師月餉經費仍專指續收捐款接濟否則已成局而皆將停罷殊失自強至計亦必貽笑外人且德廠造成之鐵甲船鋼快艦三號陸續到津更須巨餉養活並應找發價值暨洋員駛送來華回國之費正在點金乏術莫展一籌今戶部忽將捐款撥抵直隸練軍及海防添募各軍月餉似未深悉早經奏定專作水師用款已收者動支無存續收者仍待接濟也臣深知部庫支絀凡地方河工等項緊要用款向應請部撥款者但可勉強未敢遽請惟此月餉等項計口授食外閒力實未逮不得不專指部款查直隸練軍應食各省解京固本餉係同治年間戶部節次奏定由部按月給領

不應短少本屬永遠章程其海防添募各軍亦係上年戶部奏定由部庫戶儲東北邊防經費內按月如數給領本皆確有指款茲海防捐項既已留抵水師經費核計尚多不敷實難再行分撥所有練軍及添募各營月餉不得不專賴部撥免誤事機應請將練軍月餉四萬七千五百兩仍自八月起由戶部於各省固本餉內按月發足如各省欠解並由部庫通融墊發勒令補解還款以符定章至海防添募各軍分紮天津北塘山海關旅順口沿海要地實爲

京畿屏藩亦未可操切從事應請將此項月餉八萬二千兩仍由部庫暫行按月如數給領俟善後事定再將添募各營察看分別裁併可裁若干卽停餉若干以抵京旗兵餉之用屆時奏明辦理現在八月之餉尙未發放各軍難再枵腹荷戈所有八



九十等月餉項並懇照案剋日撥發以全大局理合恭摺據實陳伏乞

皇太后

皇上聖鑒俯准敕部照辦施行謹  
奏

調李鳳苞襄籌北洋片

光緒十一年九月初五日

再前在德國購造定遠鎮遠鐵甲船兩艘濟遠鋼甲快船一艘均可陸續駛抵大沽口外所雇送船之德弁水手人等四百名亟須給資遣回其留船管駕教練之德總兵式百齡等已飭統領北洋水師提督丁汝昌妥為聯絡駕馭惟此三艦皆由前出使大臣李鳳苞與德海部商廠采取西洋兵船新式繪圖監造器用理法纖悉周知該員樸誠耐勞深明西法其於各國船艦之利鈍礮臺之堅脆軍械之良窳閱歷探討八年之久實能窮究精微現當籌備海防善後之際需才孔急合無仰懇

敕下三品卿銜記名海關道李鳳苞前赴北洋襄籌一切俾資指

撥之助理合附片具陳伏乞

聖鑒訓示謹

奏

奏稿五十五

四

雲廣電綫籌款片

光緒十一年九月初五日

再臣欽奉

寄諭籌造由廣西龍州至雲南蒙自一帶電綫以通軍報遵飭總辦電局存記海關道盛宣懷妥籌辦理茲據該道電稟滇綫由廣西南甯接造至蒙自計三十二站山路崎嶇過百色卽難運料每里約工料銀一百兩需款三十餘萬且係邊荒僻境商報絕無常年設局修守之費須由官籌甚不合算儼改接鄂綫由川入滇至蒙自五千數百里其間如沙市宜昌夔州重慶瀘州成都等處生意繁盛商報較多可資養綫經費沿途木料亦易辦擬請援津甯閩粵造綫成案由四川借款十萬湖北五萬俟後分年繳還其不敷綫本及常年用費可由商局自籌其入滇境至蒙自二千餘里作爲官綫滇省力難籌措岑毓英前奏由部撥款部庫亦甚竭蹶

請在滬關存餘出使經費項下酌撥銀十六七萬兩事竣據實報銷官認養綫費用較短千里以十年計卽省十餘萬兩而川滇相通官綫亦稍有報費可貼官費等語臣查所擬辦法尙爲核實商之總理衙門王大臣意見相同蒙自一帶邊防及以後開辦通商固須有電報速達始可無誤事機卽四川籌餉調兵緊要政務亦須添設電綫呼應較靈至由漢口入川之瀘州成都均作爲商綫可免籌常年費用費由瀘州入滇境至蒙自作爲官綫以後用費亦稍節省庶爲經久之道合無仰懇

聖恩敕下四川督臣籌借銀十萬兩湖北督撫臣籌借銀五萬兩發交盛宣懷領用俟事竣分年繳還歸款並請

敕下湖廣四川雲貴各督撫派員幫同電局委員照料勘辦嚴飭沿途各地方文武一體曉諭兵民實力保護勿任阻撓拆毀至請

撥濟緩用款出使經費十六七萬兩由總理衙門及臣與南洋大臣督飭江海關道陸續撥給俾速成工是否有當理合附片陳請  
伏乞

聖鑒訓示謹

奏

派員接辦朝鮮事務摺 光緒十一年九月二十一日

奏為遴派幹員接辦朝鮮交涉通商事務恭摺仰祈

聖鑒事據駐朝總辦商務委員二品銜分省補用道陳樹棠稟稱該道駐紮漢城兼顧仁川口岸商務往來照料冒雨衝風積受潮溼上年王宮之變警報紛傳衣不解帶者滿月嚴寒所信備疾加增四肢漸覺麻木今夏雨水過多溼熱侵尋入秋竟成癱瘓之象朝鮮醫藥不便稟請給假回滬調治等情臣查陳樹棠奉派赴朝兩載有餘辦理通商尚無貽誤茲因積勞致疾自應給假調治月派幹員接替查有分省補用同知袁世凱膽略兼優能知大體前隨吳長慶帶兵東渡久駐王京壬午甲申兩次定亂情形最為熟悉朝鮮新舊黨人咸相敬重此次派令伴送李崑應歸國該國君臣殷殷慰留昨接朝王來函亦敦請該員在彼襄助若令前往接

辦當能措置裕如惟陳樹棠赴朝之時尙屬商務初開今則口岸漸增貿易日盛各國公使麇集漢城一切相機因應尤賴該員從旁贊畫似宜優其事權作為駐紮朝鮮總理交涉通商事宜略示豫聞外交之意查泰西派員出駐屬國向由外部給予文憑如蒙俞允再由臣檄飭該員刻日前往並請

飭下總理衙門加札飭遵該員袁世凱官秩較卑歷著勞績應如何

加恩超擢銜階之處出自逾格

慈施以重體制而資鎮攝所有派員接辦朝鮮交涉通商事務緣由謹繕摺由驛馳陳伏乞

皇太后

皇上聖鑒訓示謹



奏

海防捐礙難歸部片 光緒十一年九月二十一日

再臣前奏直隸海防捐款業經抵支現有水師經費所需練軍及新募各軍月餉仍請由部分別照給一案旋准戶部覆稱練軍月餉先行補放八月分一面飛催各省迅速報解部庫以供支放其新募各軍月餉暫發八九十三箇月仍迅速遣撤至該省所收捐輸銀兩應按月報部聽候指撥等因伏查撤勇事宜係臣在京時與王大臣議奏原爲節餉起見自無遷延之理但人數眾多未便操切從事除將新勇分別妥籌次第遣撤月行奏報外至直隸海防捐款前因近年各省關額解北洋經費無幾而已有之大小船艇水陸各軍及船塢船澳水雷營魚雷營礮臺學堂防營電報各項需用繁巨定購西洋雷艇礮又須按期付價不得不將捐款濟用早經臣奏請撥歸天津支應局略抵各省關短解之數業奉

諭旨允准本係欽遵辦理款已指明自無須再候部撥直隸捐款  
皆照定章實收實報絕無減成空收空銷之弊人所共知以本省  
所收之捐濟本省海防之急亦與開捐原奏符合查原撥北洋經  
費除福建廣東兩省釐金向來絲毫未解外卽就湖北江西江蘇  
浙江釐金核計近數年已欠解至一百七十八萬兩頻催罔應殊  
屬有名無實臣疊奉

諭旨創辦水師事關自強大計不敢因費絀停罷然實難爲無米  
之炊據支應局司道聲稱以前所收捐款業經陸續動用現在庫  
無存銀而月內有待發緊餉銀十餘萬兩皆刻不可緩專盼續來  
捐款隨收隨放暫應急需其鐵甲船鋼快艦三號均已抵沽應發  
月餉及找付價值並西洋員役駛送來華回國之費尙不在內仍  
須月行籌辦若必將捐款於收齊後按月報部聽候指撥轉航

延動經旬月軍士夫役萬數千人枵腹久候實有譁譟之虞斷難  
遵辦應請仍照臣奏奉

旨准原案嗣後所收捐款略抵各省短解北洋經費專濟原有水  
師急用稍資周轉無庸再候部撥以免遲誤仍將收數按月報部  
查核至新募各軍月餉及遣撤之費現撥部款有無不敷應俟酌  
撤後核計奏明辦理其練軍為畿輔經制之師月餉專指部款應  
仍按月赴領俾固軍心理合附片具陳伏乞

聖鑒敕部查照謹

奏

赴朝人員請獎摺

光緒十一年九月二十八日

奏爲派往朝鮮歷年防護定亂出力人員遵

旨擇尤酌保恭摺仰祈

聖鑒事竊臣欽奉九月初八日

寄諭前經派往朝鮮之親慶等營駐防四年藉資鎮撫上年亂黨滋事一切因應機宜尙稱妥協著李鴻章擇其尤爲出力者覈實保獎等因欽此仰見

朝廷激勵戎行有勞必錄至意當經轉行遵照茲據統領親慶等營記名提督吳兆有黃仕林統領北洋水師記名提督天津鎮總兵丁汝昌等分別開送前來伏查親兵慶字六營三千餘人自光緒八年派往朝鮮先平內亂旋即駐防漢城一帶該國積弱已久軍紀蕩然日兵猝至外患未已君民危懼方深經該將領等宣布

德威隨時布置防範相機因應人心藉以鎮定並教練朝兵俾其  
化弱爲強上年朝臣金玉均等謀爲不軌潛約日兵入宮迫脅國  
王戕害大臣倉猝蚌成舉國鼎沸各營將士親冒鋒鏑於鎗礮如  
雨之下出死力以相援卒能靖內禦外使該國不蹈琉球覆轍前  
接該國王來咨謂吳兆有等駐防數年不憚勞苦馭軍嚴整民懷  
敵畏去年十月之變身先士卒衝鋒冒難驅退日兵掃除亂黨使  
該國宗社危而復安生民亡而復存孤軍遠戍再靖藩服誠爲不  
世之奇績等語尙屬信而有徵至北洋水師各船連年派往巡防  
與陸軍相爲保衛當該國內亂之時員弁親歷行陣分扼海口以  
伐敵謀皆足彰

聖朝扶危定傾之義其功實未可泯茲陸軍雖先後凱旋水師仍  
時往巡護自應欽遵

特旨一體酌保此係久成屬邦立功海外異常勞績本無定例可  
循謹擇其尤爲出力者核實開單敬呈

御覽凡出力稍次者悉已刪減不敢稍有冒濫仰懇

天恩俯准照擬給獎以昭激勸而勵將來至該統領吳兆有黃仕  
林丁汝昌督率調度動合機宜擬請

旨均予從優議敘其應給五六品頂戴千把等項月行照章咨部  
註冊理合恭摺具陳伏乞

皇太后

皇上聖鑒訓示謹

奏

奏保章洪鈞片

光緒十一年九月二十八日

再翰林院編修章洪鈞自光緒七年奏調赴直隨辦海防並中外  
交涉事件實力襄助一切今閱五年之久資勞甚深其於朝  
鮮派軍防護及上年定亂事宜尤能贊畫軍謀發縱指示異常出  
力自應聲請給獎該員廉靜忠實深明大體識力堅卓志節清嚴  
平時守道自重遇事則義理詳明毅然斷制有經世之學而無迂  
拘之見實為不易得之才若試以道府之任必能表率僚屬整飭  
吏治藉挽近時因循泄沓之風臣於光緒九年十二月間曾附片  
密保聲明該員日後儻有貪酷竇蹟願甘同罪等語仰蒙

聖鑒在案目今時艱孔亟人才難得臣謬膺重寄年力衰憊時懼  
不能勝任亟思得賢助理章洪鈞才品心術素所深知在外五年  
本衙門資俸已斷而其忠於所事從公勤勞若長此沈淪殊屬可



情朝鮮一役始終贊助惟係侍從之班未便擅擬應如何優加獎  
擢以昭激勸而資展布之處出自逾格

恩施伏候

聖裁謹據實附片具

奏

續選出洋學生摺

光緒十一年十月初十日

奏為續選閩廠學生第三次出洋肄業擬請加展年限並遞派華洋監督以專責成恭摺仰祈

聖鑒事竊光緒二年七年兩次選派閩廠學生分赴英法各國學習節經臣等奏奉

俞旨此案查閩廠水師學堂設立多年前堂專習製造後堂專習駕駛現值倡練海軍駕駛之才視製造為尤亟北洋舊有蚊快各船均以閩局學成回華之學生充當管駕尚為得力目下新購鐵艦到沽機器極精雖履定洋員教練而華員尙少獨當一面之選將來逐年添置船隻日新月盛而駕駛為專門名家之學未可兩莽從事若不亟為儲備實有乏才之慮即製造一端亦宜力求精進以期日起有功臣等往復咨商擬續選前堂學生十三名藝徒

四名分赴英法德各國官廠學習製造月選後堂學生九名專赴英國水師學堂鐵甲兵船學習駕駛其計生徒二十二名作爲第三次出洋肄業尅日前往該生徒分途投學凡訪聘名師稽考課業約束規矩必須有華洋監督專管其事隨時稟商各國出使大臣轉商各外部海部給照分派方可望其盡心指授學有進益查有福建候補道周懋琦才識淹通留心西學現充船政提調待生徒如子弟勸懲情董兼施臣蔭森與其事半年知之最稔以之派充出洋監督可期勝任至洋監督須熟悉西洋情事又能與華員和衷協力頗難得人查有法員日意格由該國水師出身久襄船政素與學生情意融洽前在洋督課亦甚勤懇出使大臣許景澄函稱該員仍願接辦始終其事自可派令與周懋琦會商以資熟手所需經費應查照前章由閩省釐金及閩海關四成洋

稅船政經費項下分別籌撥惟向例學生出洋定限三年爲期太  
促所學不全駕駛學生每年僅有兩箇月在大兵船閱歷亦淺以  
後擬將製造學生展限三年俾之深造有得其駕駛學生改爲每  
年扣足六箇月在船無庸加展年限此後天津學堂駕駛學生材  
質有可造就者亦卽陸續挑派隨同出洋肄習以廣甄陶至六年  
內每年每項需用若干應由臣蔭森督飭各監督查照舊章切實  
核減另行具奏所有續選閩廠第三次學生出洋肄業並遴派華  
洋監督緣由除咨明出使英法德大臣就近督飭認真辦理外謹  
會同南洋大臣兩江總督臣曾國荃署福州將軍臣古尼音布閩  
浙總督兼署福建巡撫臣楊昌濬恭摺馳陳伏乞

皇太后

皇上聖鑒訓示謹

奏

驗收鐵甲快船摺

光緒十一年十月十八日

奏爲定遠鎮遠濟遠等船先後抵沽經臣派員驗收並親赴海外  
駛驗乘往旅順口巡閱兩岸礮臺恭摺仰祈

聖鑒事竊前在德國伏爾鏗廠訂造定遠鎮遠鐵甲船二隻濟遠  
鋼甲快船一隻雇用德國弁役駕駛來華陸續到沽臣飭統領北  
洋水師天津鎮總兵丁汝昌津海關道周馥隨帶洋文憑單並原  
訂合同前往驗收認真查勘該鎮道等督同華洋員弁分詣各船  
按照合同逐細勘驗因各國製造均用英尺遂以英尺較量計每  
尺合中國工部營造尺九寸六分定遠一艦量得長二百九十八  
尺五寸其最寬處六十尺四寸喫水十九尺六寸有奇其中段護  
衛機艙之鋼面鐵甲堡兩邊各長一百四十四尺厚十四寸礮臺  
甲厚十二寸令臺甲厚八寸艙內設康邦大輪機兩具其寶馬力

六千匹船頭左右及船後其設魚雷第三具月帶小魚雷艇兩艘  
小輪船一艘艙內淡水櫃二十具其造淡水機器每日可供三百  
人食用全船電燈二百四十盞另有桅上最大電燈二盞一可敵  
二萬枝燭光一可敵八千枝燭光艙上設十二寸口徑大鋼礮四  
尊六寸口徑長鋼礮兩尊三寸口徑長鋼礮四尊一二寸口徑五  
管連珠礮共十尊後膛連珠鎗五百二十五桿每半時可行十四  
海里半約合中國四十七里此驗收定遠之情形也鎮遠鐵甲厚  
薄一切布置均與定遠相同惟定遠水綫下全係鋼面鐵甲鎮遠  
水綫下則參用鐵甲因當時外洋鋼價陡長故爲此變通之計卷  
查合同亦已載明而兩艦關係緊要之處皆用鋼面鐵甲保護機  
器此定遠與鎮遠大致相似之情形也濟遠快船長二百三十六  
尺三寸其最寬處三十四尺喫水十五尺八寸有穹甲以覆機艙

甲由邊凹形如龜甲係以一寸鋼二寸鐵製成其甲邊深入船旁水綫下四尺若敵礮擊在甲邊之上則穹甲可護各船如擊在甲邊之下則藉橫水阻力可免穿透係仿照英國赫士本船式製造船內康邦機器兩具共計實馬力二千八百匹前後左右備放魚雷之筒四具船面另帶可放魚雷之小艇兩艘船內淡水櫃八具其造淡水機器每日可供百餘人食用電燈八十盞另有桅上最大電燈可敵二萬枝燭光船上設八寸半口徑長鋼礮二尊六寸口徑長鋼礮一尊一二三寸口徑鋼礮連珠礮其七尊後膛連珠礮一百三十六桿每半時可行十五海里即中國五十里該艦以穹甲籠罩機艙故機艙較窄然其喫水淺行駛速在快船中實爲新式堅利之船惟機艙既窄則煤櫃不大連穹甲上十八隔堵其祇裝煤二百七十噸以每日用煤三十噸計之足供八日之用較



之定遠鎮遠各裝煤七百噸日用六十餘噸其用意無甚懸殊此  
又濟遠之實在情形也該鎮道等查得三艦各件悉與原訂合同  
相符遂將驗收憑單親書收到字樣交還鎮遠管駕麥蘭定遠管  
駕福士濟遠管駕恩諾爾等寄回德國伏耳鏗廠於九月二十一  
二十二月初一等日陸續換掛中國龍旗升礮如儀華洋弁兵  
歡呼稱賀據實稟復前來臣於十月十一日馳往大沽登舟覆勘  
無異卽於十二日寅刻乘坐定遠並督同鎮遠濟遠各船展輪出  
洋試驗速率是日北風甚勁海濤洶湧船行平穩如常略無顛簸  
西刻駛抵旅順口十三日登岸履勘東西兩岸臺壘東岸黃金山  
嶗嶽嘴等處礮臺建造已久其西岸饅頭山嶺子營老虎尾新修  
各礮臺亦已一律完固布置均得地勢各軍演放後膛鎗礮頗能  
中靶十四日丑刻起旋回津未刻抵沽核計往返水程與原訂合

同里數不甚差謬而三船經過印度洋面風浪險惡輪軸屢經挫損尙能照常迅駛則其機器之精堅可知中國自勦辦師船以來實惟此爲攻堅禦敵之利器惟有器尤須有人以臣十數年來所建議經營合數省之財力糜數百萬之金錢始克有此巨艦若以駕駛之任委之生手實不放心除酌留德國雇來員弁分派教練外所有管駕暨大二三副管輪鍋爐升火人等均挑選素在兵船之學生及船廠當差之熟手以資得力此次行駛大洋已能運掉自如但鐵艦爲西國專門名家之學其機件之繁重理法之精深行陣之變化中國弁兵人等尙難一蹴而幾惟有督策將領細心講求切實訓練務求嫻習以期折衝制勝仰慰

宸廑目下北河封凍海軍不便操練擬令丁汝昌督率三艦及原有之超勇揚威兩快船前赴廈門澎湖一帶和暖之處逐日勤操

俾弁兵膽藝漸臻純熟藉以周歷沿海形勢風濤俟來春二月再駛回北洋聽候醇親王等親臨閱看除將定遠鎮遠兩艦同式繪圖五幅濟遠艦繪圖五幅並洋廠原造小模樣二具咨送軍機處進呈

御覽外所有試驗鐵艦快船並巡閱旅順各緣由謹繕摺具陳伏乞

皇太后

皇上聖鑒訓示謹

奏

駕船回華人員請獎片

光緒十一年十月十八日

再游擊劉步蟾等前經臣派赴德國照料鐵艦工程該員等駐洋三載有餘於製造駕駛各理法認真研究頗有心得此次幫同德弁駕駛來華遠涉風濤數萬里俱臻平穩實屬不避艱險奮勉異常查光緒七年英廠訂購超勇揚威二船駕駛回華其在事出力人員奏蒙

獎敘在案此次幫帶鐵艦回華事同一律該游擊等往返重洋究心船學材藝既堪造就勞績實邁尋常自應援照成案擇尤擬獎開列清單恭呈

御覽顯懇

天恩俯准照擬給獎以資鼓勵伏乞

聖鑒訓示施行除應拔補千把總各弁照章咨部註冊外謹附片

奏具

謹將出洋幫同駕駛鐵艦來華尤爲出力之員弁酌擬獎勵  
開列清單恭呈

御覽

花翎副將銜留閩儘先游擊劉步蟾擬請免補游擊以水師參將  
儘先補用並加總兵銜

都司銜留閩浙儘先千總陸麟清五品軍功留閩浙儘先千總余  
貞順五品軍功留閩儘先千總邱寶仁均請以守備儘先補用並  
賞戴花翎

分發補用同知楊兆壑擬請免補本班以知府分發省分補用

四品銜分部主事胡潔請以直隸州知州儘先選用

舉人陳伯勳請以教諭不論雙單月儘先選用

附生丁應澍請以巡檢不論雙單月儘先選用

六品軍功留閣儘先外委梁祖全六品軍功林履中均請以千總  
補用並

賞戴藍翎

貝勒璫請獎片

光緒十一年十月十八日

再定遠鎮遠濟遠三艦所雇德國員役除酌留教練外餘均一律  
籌給薪資船費安遣回國該三艦弁役四百餘人在大沽口外航  
延一月之久人數眾多帳目轉轉與周馥等總擾不已勒索多端  
經臣商令德國駐津領事貝勒璫赴船認真彈壓秉公調停始得  
帖然無事該領事顧全大局勞瘁不辭應懇

恩賞給該領事貝勒璫三等第一寶星以昭激勸至前在德訂造  
三艦幫同出力海部人員俟與出使大臣查明續行具奏外伏乞  
聖鑒訓示謹附片具

奏



豫岸仍請加耗摺

光緒十一年十月十八日

奏爲豫岸蘆商責令增交榮工部款力實難支仍請照案暫加耗鹽積資貼補恭摺仰祈

聖鑒事竊前因豫岸蘆商於每年原交榮工部款銀五萬兩外再交三萬兩商力不逮請照案暫加耗鹽每包二十斤以資貼補旋經戶部議覆耗鹽毋庸暫加應勸諭各商報效每年交銀八萬兩備仍推諉卽由豫省設局按引抽收等因當飭長蘆運司傳諭遵照茲據該司季邦楨詳據南引商人潤代興等稟稱豫岸蘆鹽前於同治十三年奏准每包加耗鹽二十斤固由道遠運艱傷耗過重亦因捐交榮工銀兩眾商無力藉補虧賠緣河南一省分銷淮東督蘆四省之鹽引岸壤地相接小民錙銖必較鹽價一有軒輊必受鄰私充斥故歷年以來應交榮工銀五萬兩名雖加價於民

多係由商捐繳賴有此項耗鹽尚可稍資貼補迨光緒五年限滿  
 減為加耗十斤賠累較多交款竭蹶上年停止加耗鹽包傷折無  
 從彌補包賠部款籌措益難今更責令增交八萬兩商等若照數  
 認交無可賠貼不得不請照案加耗二十斤以期上顧餉項下補  
 商虧非敢妄生希冀茲部議以行豫蘆鹽每年約銷二十萬引每  
 引加耗二十斤歲須多售四百萬斤耗鹽幾佔一萬道有課額引  
 名雖恤商實則虧課又以前請緩復停引案內有加斤滯銷之言  
 更恐加耗佔礙正引銷路惟查所請加耗按每年行銷二十萬引  
 應加四百萬斤之數計僅七千餘包並無一萬道之多且豫省引  
 岸距津自千餘里至二千餘里不等鹽包在途日久舟車盤剝風  
 雨侵淋比及挽運到廠每包須短三四十斤按二十萬引核算約  
 短一萬餘包是加耗二十斤不足抵正鹽之傷折無虞佔礙額引

蘆商課款向係商人包額完交亦無因加耗轉致虧課之弊至前請緩復停引案內加斤滯銷之語係指道光二十八年南北引每包統加正鹽一百五十斤而言若豫鹽加耗以之抵除長途傷折尚多不足實於銷路無礙近年南引出庫在二十萬以外較從前歲有加增可爲不佔銷路之明證茲若交款之數有加無已而恤商之典未易允行商力幾何必難爲繼如由豫省設局抽收丁役藉端滋弊尤多騷擾防不勝防商倒課懸將不能免瀝情呈懇仍予照案暫加耗鹽俾照數認交銀兩該司詳加體察所呈委係實情詳請具

奏前來臣查豫岸蘆鹽每包擬暫加耗二十斤原因責令增交榮工部款每年至八萬兩之多遂有此請係出於必不得已蓋蘆鹽加價於民卽有官不敵私之弊商人圖銷鹽斤冀早收回成本勢

難照數加價且豫岸道遠運艱傷耗太重有此加耗可冀正鹽無  
大傷折藉以貼補交款實屬以公濟公各商前請俟榮工部款還  
竣卽將八萬兩交款並賣鹽加價及所加耗鹽一併停止仍照舊  
章辦理可知加價加耗皆非其樂爲也如果商人於中有利不妨  
實令報效今則殷商無多累商居其大半又值災歉頻仍情形竭  
蹙約計加價加耗所得不敷應交八萬兩巨款已屬強其所難若  
再不准加耗必更款無所出卽使執法嚴追恐致參懸相繼於正  
課亦有虧損長蘆積疲已久近年臣與運司設法整頓竭力維持  
運銷漸有起色正課較前多收儻因額外交款牽動大局未免可  
惜且但責增交銀款而不稍示體恤亦不足以昭平允旣據運司  
查明並不佔礙額引銷路應請仍照原奏暫加耗鹽二十斤卽令  
每年交銀八萬兩庶裕餉恤商並行不悖仍自奏准之日爲始予

限五年限滿應否一併停止再行察看核辦理合恭摺具陳伏乞  
皇太后

皇上聖鑒敕部核覆施行謹  
奏

附省隄河工程摺

光緒十一年十月十八日

奏爲光緒十一年附近省城隄河歲搶修工段丈尺動支銀數循  
案開單奏報仰祈

聖鑒事竊照附近省城河道隄工或工段縣長或地居險要皆關  
民生利害必須認真修防前經奏定每年於清河道庫河淤地租  
堡船稅夫生息項下撥銀三千兩以爲各工採購物料搶修之用  
免其造冊報銷經工部覆准仍令工竣時開單奏報嗣因地租生  
息不敷動支奏准於藩庫旗租項下湊撥在案光緒十一年開凍  
後卽飭照數撥給購備樁料旋責成署清河道劉汝翼駐工督辦  
伏秋汛內雨水過多各河同時盛漲大清河趙王河大溜洶湧拍  
岸盈隄西淀水日擡高狂風巨浪屢將千里隄撞擊塌剝其緒龍  
河及雄縣趙村大壩亦皆險工屢出均經該道督率印委分投設

法搶鑿竭數月之力一律保護平穩據該道會同藩臬兩司將工  
段丈尺動用銀數遵照定章詳報前來除民夫土方等項仍歸民  
辦外所有搶修椿料用款覆核無浮理合開具簡明清單恭摺具  
奏伏乞

皇太后

皇上聖鑒敕部知照謹

奏

裁遣新營停領部餉摺

光緒十一年十月二十一日

奏為上年添募勇營遵經分別裁遣停領部餉恭摺仰祈  
聖鑒事竊臣在京時與王大臣籌議裁勇節餉事宜欽奉

諭旨

上諭即行遵照回津後復與會辦北洋事宜吳大澂及各統  
領妥籌辦法查上年畿防喫緊先後遵

旨添募勇營每月奉撥部餉銀八萬二千兩計廣東水師提督曹  
克忠新募津勝六營一哨駐山海關四川提督宋慶添募毅左四  
營駐旅順口署湖南提督周盛波添募盛字十營與總兵徐邦道  
添募拱衛兩營分扼津沽沿海要地廣東陸路提督唐仁廉添募  
仁字副營一營駐北塘口北岸尖大澂添募綏字等三營駐樂亭  
洋河口以上共新募步隊二十六營一哨本擬全數裁撤惟念上



年編奉

寄諭以北塘海口空虛該口爲近畿要路北岸地面空闊僅義勝一營當煙頭沽來路勢孤力弱

飭卽月添勇營擇要扼守等因茲所募仁字副營駐防北塘北岸青坨寺實當要隘勢難遽撤酌留該營就已築臺壘認真訓練以爲犄角盛軍本係勁旅其添募之礮隊一營尤極精壯配用克虜卜後膛新礮仿德國營制嚴勤操練人馬皆已嫻熟足當大敵亦應酌留免致有事時募練不易徐邦道拱衛兩營前奏歸都統善應調遣昨准該都統函商津沽爲

京師門戶沿海要區未可全撤但該兩營現紮軍糧城後路旣爲節餉起見應飭裁去一營三哨仍酌留礮隊兩哨該總兵本止馬隊二營輔以礮隊馳擊平原遇敵乃可得勁並准吳大澂咨稱擬

酌留紱軍一營庶緩急可恃此因

畿輔海防關係重要非他省情形可比沿海地段脈長原有各營不敷分布外患難測不得不深謀遠慮用備不虞其餘新募洋隊二十二營四哨共一萬數千人全行裁汰該勇夫等籍隸東豫蘇皖卽白九月底十月初爲始次第撤遣責成各統領收繳軍械號衣遞派營哨官分起分路押送回籍沿途嚴加約束不准流離生事並咨行地方官會同照料其有需船車者由營雇備凡員弁勇夫薪餉各項距籍近者發至十月底止遠者發至十一月底止俾資路費現均陸續出境安靜無擾統計應發薪糧等項所需甚巨部餉僅領至十月底止其不敷遣撤之費及酌留兩營兩哨此後月餉由臣於淮軍額餉內暫行撙節通融湊濟吳大澂所留紱字一營此後月餉由該副都御史於該軍原餉內勻放均不另請

部款以昭節省原領新募各營部餉卽於十月以後截止伏查前  
奉

懿旨各省營勇每年裁節銀二三十萬兩以供京旗各營加餉練  
兵之用並以經理海防善後需款甚巨籌餉甚難等因欽此戶部  
來咨亦以現練海軍須資裁營挹注臣維贍京旗治海軍實爲經  
久遠大要圖直隸本缺額之區貧窘異常他項無可設法而裁撤  
添募勇營自本年十一月起每月可省出部餉銀八萬二千兩每  
年合九十八萬四千兩實爲大宗臣愚擬請以三十萬兩爲京旗  
加餉之用其餘六十八萬四千兩撥交海軍衙門充餉以備添購  
鐵艦募養水兵之用如此一轉移間部庫無待月籌要圖藉可興  
舉是否有當懇

敕部臣核議施行所有添募各軍分別裁遣緣由理合恭摺山驛

覆陳伏乞

皇太后

皇上聖鑒訓示謹

奏

甘軍移駐鳳凰邊門摺

光緒十一年十月二十六日

奏爲營口甘軍九營陸續移往鳳凰邊門以外擇要扼紮並布置大略情形恭摺覆陳仰祈

聖鑒事竊臣等欽奉光緒十一年九月二十三日

寄諭東三省邊防關繫極爲緊要奉天鳳凰邊門一帶伏莽未清尤虞宵小蠢動亟應增營鎮懾現在營口防務已鬆所有雷正綰馬步九營卽著該提督移往鳳凰邊門以外擇要扼紮用備緩急一切布置機宜著李鴻章與慶裕雷正綰慎密籌商務臻妥善等因欽此仰見

聖謨廣運鎮懾邊陲卽以保護瀋服欽佩莫名臣等遵卽咨商雷正綰作速拔隊啟程旋據該提督覆稱現節逾小雪關外早寒地已封凍不能修築營壘若全軍同時開往勢難一一安頓露宿可

虞擬派管帶前營補用提督李廣珠管帶右營記名提督楊耀關  
管帶馬隊右營補用總兵耶永清等三員帶領馬步三營於十月  
十一日先行開拔並飭管帶馬隊左營記名提督陳義帶隊由營  
口至鳳凰邊門沿途分紮接遞文報兼護轉運其餘馬步五營俟  
該提督親赴邊門踴勘地勢相度周安再行續調前進臣慶裕酌  
派奉軍統領記名提督左寶貴隨雷正綰前往籌商一切並飭東  
邊道奎訓督率道標靖邊五營隨同講求操防臣鴻章接奎訓電  
報耶永清楊耀關兩營已於二十一二十三等日行抵邊門外分  
駐哈嗎塘唐三城等處其李廣珠一營亦剋日可到惟奉高毗連  
以鴨綠江爲界甘軍營壘祇可就江之西岸擇要分布以壯聲勢  
若渡江而東抵朝鮮王城尙千有餘里萬一有事赴援步騎孰爲  
合宜水陸孰爲衝要餉械之轉輸蹊徑之嚮導皆不可不預爲籌

畫查朝鮮平壤府本係舊都南至王京五百五十里北至義州五百一十里爲適中之地臣鴻章緘商雷正綰於行抵邊門後密派精細員弁由鳳凰城守尉知照朝鮮地方官稽查探道路爲名前赴該處察看險要並就土著人等詳詢形勢繪圖帖說以備綏急之用頃據駐紮朝鮮通商委員袁世凱電稟朝城尙屬平靖東邊至漢城電綫接聯直達津瀋呼應易通以後遇有緊要事機自可隨時互相商榷相機策應所有甘軍陸續移往東邊各緣由謹會同陝西固原提督臣雷正綰合詞恭摺馳陳伏乞

皇太后

皇上聖鑒謹

奏

改撥淮餉仍請照撥片

光緒十一年十月二十六日

再四川月協淮軍餉銀三萬兩上年因挪供霆軍月餉經戶部奏  
明自光緒十年十一月爲始全行停解片由江蘇每月籌銀一萬  
兩安徽山東每月各籌銀五千兩撥充淮餉並聲明先行撥定一  
年後一年後酌核情形再爲指撥等因查此次改撥銀數比較從  
前川省協款每月已減萬金各省亦未能照部撥之數依限批解  
卽如山東一省自改撥以來僅據解到兩批短欠尤夥現計一年  
期滿新餉收數無幾而川省原協之款尙未能照舊撥還若將改  
撥之餉遽行停止淮軍分防近畿沿海要地急待支放實有難以  
周轉之勢應懇

天恩准將前項改撥淮餉

飭部行催各生源如數籌解俟川省協款有著再行停撥理合



附片具陳伏乞

聖鑒訓示謹

奏

曹克忠乞病摺

光緒十一年十一月十六日

奏為專闕大員因積勞觸發舊傷籲懇

天恩准令開缺回籍俾資調理恭摺仰祈

聖鑒事竊廣東水師提督曹克忠所募津勝六營一哨駐紮山海關昨因部餉缺乏檄令裁遣業經辦理就緒

奏報在案茲據該提督呈稱撤防以後理應赴廣東本任供職惟

克忠束髮從戎轉戰南北疊受重傷自甘肅任內丁憂回籍雖家居數年調養就愈而此次駐紮榆關海濱卑溼地氣嚴寒到防後

日與將弁勇丁講求操防修築營壘事事躬親督率不敢稍涉疏

懈以致海風潮溼襲入筋絡觸動舊傷九月間即已舉發至今調

理尙未就痊若以病軀赴任必至有礙職守乞據情代奏懇

恩開缺等因前來臣查曹克忠久隨將軍多隆阿征勦髮捻回逆

謀勇過人戰功卓著前由甘肅提督丁憂回津杜門卻壻口不言  
兵上年因海防喫緊奉

旨起用臣商令募帶數營扼守山海關要地布置訓練紀律嚴明  
旋拜廣東水師提督之

命跡其出處實能相時緩急應變赴機茲解兵後積勞傷發願請  
開缺養病情詞甚爲誠懇該提督年踰六旬久勞征役未便強令  
遠赴炎瘴之區相應仰懇

天恩准其開缺調理以示體恤所遺廣東水師提督員缺並請

旨迅賜簡放以重職守至曹克忠前在軍營身經百戰徧體鱗傷  
勳績在人耳目可否

加恩賞食全俸之處出自逾格

慈施謹繕摺由驛具陳伏乞

皇太后

皇上聖鑒訓示謹

奏

津關請緩解欠款片

光緒十一年十一月十六日

再准戶部咨開津海關原撥光緒六七年東北邊防經費除已解外尙欠銀十二萬餘兩又本年抵閩京餉銀二萬兩催令籌解等因當經轉行遵照茲據津海關道周馥詳稱前項欠解銀兩應於六成洋稅內動支惟該關所徵六成洋稅除提出一成半解充出使經費並坐支稅務司經費等項所餘有限向應儘數撥充津防練軍月餉歷因稅款不足借提運庫應解保定練餉藉濟急需疊將支絀情形詳請奏咨並蒙戶部洞悉該關六成洋稅不敷勻撥議准緩解欠餉在案但使力能周轉曷敢稍有稽延實緣稅收祇有此數而津防練軍月餉計口授食刻不容緩現已封河稅無可收應放本年臘月及來年正二月軍餉及稅務司經費等項尙多不敷惟既奉部飭催萬不得已暫於現放軍餉內竭力勻出銀一

萬兩派員劉中鶴解部收歸東北邊防經費應用其餘欠解銀兩  
委屬無從籌撥請俟稅收稍旺如可騰挪陸續補解等情具詳請  
奏前來臣查直隸商貨無多津關稅收本少又半爲江海等關免  
單佔去厯係人不敷出並非存銀不解今該關道因部催緊急於  
現放軍餉內設法勻解銀一萬兩實屬不遺餘力合無仰懇

天恩俯念津沽海防餉需同關緊要練軍月餉尙多不足難再勻  
提准將欠解前項銀兩緩俟稅收稍旺陸續補解免誤軍食而顧  
要防理合附片具陳伏乞

聖鑒訓示謹

奏

東淀清理完竣摺

光緒十一年十一月二十六日

奏爲東淀水道清理完竣恭摺仰祈

聖鑒事竊查東淀爲大清等河尾閘蓄洩之區關係至重前因附近鄉民逐漸侵種百數十年來竟已佔去大半叢蘆密葦彌望無涯不特難容多水卽淀中舊有河道亦因而淤墊重煩官款挑挖該淀既節節壅滯上游各河遂泛濫爲災必須及時清理惟侵種之地相沿已久愚民不知例禁或輾轉價買衣食所資亦未便一律禁絕經臣派委分發直隸補用道金福曾會同天津道督飭沿淀霸州文安大城靜海四州縣妥細斟酌勘辦議定章程四條一曰定界址凡有礙水道及現在水深數尺尙有淀形之處應留出以資蓄水永遠不准栽葦墾植其中有完納葦課水泊等糧者查明奏請豁免若稍礙水道而久被淤墊驟難收回者令於地中多

開溝渠使水至仍可流貫一日設堡船淀中須藉堡船奴夫撈泥挖淺凡礙水之蘆葦芡草隨時芟刈以期日久見功應就所收租息多寡以定船數一日議租息凡不甚礙水道地畝有糧額者就糧核地照舊完納無糧者從輕議租上等以每畝三分爲率次則遞減惟淀中漲涸無定無庸升科此後若礙水道仍應停種免租讓地於水所收租息卽作堡船經費一日均差徭淀地皆在水濱升科尙且不便何況差徭乃州縣苛派書役需索大戶則隱射邀免盡累貧民應體察分別裁減均平以昭公允會於光緒八年正月會同府尹具奏奉

旨知道了欽此咨行欽遵在案嗣據該道金福曾會同前署天津道胡燏棻現任天津道萬培因清理完竣繪造圖冊詳請奏咨前來臣查東淀有礙水道之地已據疊次逐細履勘凡水勢較深尙



有淀形可驗者自靜海高家三分地西南邊起至柳行地東北邊止其長三千八百八十弓自大口子地東南邊起至高家四分地西北邊止其上寬一千二百四十八弓自大王家地西北邊起至楊家地東南邊止其中寬一千五百六弓自中亭隄起至隔淀隄止其下寬二百八十四弓方圓合二十七八里卽留以蓄水明立界石永遠不准侵種違卽嚴懲界內有民間無糧之地及王府地畝本無糧賦均讓於水外計爲水所佔民糧地一百十四頃十九畝八分二釐八毫額羨租地十畝五分四釐應徵正耗銀兩月行查明取具冊結請豁其無甚礙水處所業經佔墾之地水小之年仍准墾種照章分別開挖溝渠並由埽船疏通水道內除原有糧額者就糧核地外文明文安縣無糧地五百一頃五十四畝八分五釐三毫大城縣無糧地十三頃霸州無糧地九頃五十三畝二

分靜海縣無糧地三百五十五頃五十九畝六分文霸地處上游收成較厚每年每畝徵租息銀三分大城靜海地勢低窪收成較薄每年每畝徵租息銀一分五釐計文安縣應徵銀一千五百四兩六錢四分五釐大城縣應徵銀十九兩五錢霸州應徵銀二十八兩五錢九分六釐靜海縣應徵銀五百三十三兩三錢九分四釐四州縣共丈出無糧地八百七十九頃六十七畝六分五釐三毫共議徵租息銀二千八十六兩一錢三分五釐六毫自光緒九年一起按照此數令該四州縣分上下兩忙徵收解充堡船經費前議設堡船六十隻奴夫一百二十名由該道等督飭委員經理係自八年辦起暫令奴夫自備船隻每船連奴夫兩名日給船價工食津錢九百文每年三月開工九月停止如遇水勢消漲隨時變通辦理所有支用款目及開工停止日期按年造冊報部此

項定地租息中稔之年照常徵收若值災歉應將被水失收之地勘明段落頃畝照安州東北淀地成案分別豁減緩徵其每年徵收銀數是否全完應於次年專案造冊咨銷無庸附入八項旗租之後以歸簡便而示區別九十一等年租息會飭按期開徵惟九年因災議停十一年亦有停緩之處應俟此次定案後卽飭同各年用過堡船經費分年補造送部沿淀村莊各項無名徭役私費概行革除河剝船等差徭亦分別酌減不准官役絲毫浮派大戶隱射取巧以恤貧民除將清冊圖說咨送戶部外所有清理東淀水道完竣緣由理合會同兼管順天府府尹臣畢道遠順天府府尹臣沈秉成恭摺具陳伏乞

皇太后

皇上聖鑒敕部查照謹

奏

易和子一五

三

傅振邦從祀昭忠祠片

光緒十一年十一月二十六日

再准直隸提督李長樂文稱據古北口理事同知文麟稟據密雲縣紳士趙士英等聯名呈稱原任湖北提督傅振邦由侍衛出任湖南都司隨提督向榮勦辦髮逆轉戰湘鄂江皖等省懋著勳勞洵膺專閫嗣奉

命督辦三省勦匪事宜旋經僧格林沁奏令總統全軍掃蕩東捻同治七年西捻張總愚北犯竄擾

畿疆振邦復帶隊隨勦所向有功同治八年

簡授直隸提督到任後整頓練軍督率操防力掃綠營積習同治十二年口外馬賊吳振英莊恆太等倡亂於朝陽縣之東荒聚眾千餘縱橫四擾震及邊關振邦督兵勦捕敗賊於大力八溝等處生擒逆首解散脅從東荒素爲盜藪自是十餘年來不復有嘯聚

之事光緒元年奉天馬賊猖獗振邦派隊協剿盡殲醜類奉省全境肅清直隸沿邊亦賴以安堵在任十年刻已急公所入俸薪捐濟公用如津貼差盤墊放兵食動輒千金其餘培植義學存恤孤寡設潮河渡船修新開嶺路見善必爲不遺餘力功德在民同聲感戴懇請附祀古北口昭忠祠以伸報享由該提督呈請具奏前來臣查傅振邦由侍衛洊膺闕奇身後仰蒙

卹諡其戰功事蹟久在

聖明嘉獎之中古北口爲該故提督駐紮之所遺愛在人謚思勿替該紳士等聯名呈請附祀出於愛戴至誠懇懇

恩施准將傅振邦附祀古北口昭忠祠以彰忠盡而順輿情伏乞聖鑒訓示謹附片具

奏

朝使錫徵紅襪減稅摺

光緒十一年十二月初一日

奏爲奉天與朝鮮原訂邊民交易章程內使臣等行李貨物一條應酌量蠲徵並減輕商民紅襪稅項以恤藩邦恭摺仰祈

聖鑒事竊本年七月間准朝鮮國王李熙來咨海禁既開商務伊始中江徵稅雖不得不舉第事係勦行使臣等行李貨物除照斤數蠲免外概用抽徵行之未幾其害已形現紅襪值百抽十五已有偏重之患回貨之稅分毫釐亦多喫虧之歎每一番使行便有多少礙難前准禮部奏咨欽奉光緒八年十月二十二日

上諭朝鮮國朝賀陳奏等使臣齋咨官自入境以及到京所帶貨物仍照例免稅欽遵在案竊請據情轉奏嗣後貢使及齋咨官來回所帶行李貨物並照舊章特准蠲徵等因並據齋咨官李應浚到津聲稱紅襪既值百抽十五而稅外又有秤頭加色及釐金等

項商民苦累不堪等語當經督飭津海關道周馥查得光緒八年議訂中國朝鮮商民水陸貿易章程首載朝鮮久列藩封典禮所關一切均有定制毋庸更議原知貢使免稅載在會典及禮部則例遵行已久本與通商無涉其貿易章程第五條所載設立關卡徵收稅課亦指商民貿易而言並未將使臣隨帶之貨併入應徵之內嗣據原任東邊道陳本植會同朝鮮陪臣魚允中續議詳細章程遂有使臣等准帶行李貨物若干逾額不准免稅之條查其章程第八條內開使臣不攜帶貨物所帶衣服行李書籍藥物每員以三百斤爲度差官每員准帶紅縷二十斤衣服行李零星貨物一百六十斤從人每名准帶紅縷十斤衣服行李零星貨物八十斤均照報部員名實數以爲定限另有包裹確係屏帳纛重途中食物再行量予免稅此外裝箱成捆查係貨物仍報明納稅等



語至紅襍稅一項津海關道周馥等與朝官原議時因泰西各國凡富家所用之物稅則加重故定爲值百抽十五然章程內會載明後有增損之處應隨時由北洋大臣與該國王咨商妥善請

旨定奪施行今查禮部既於光緒八年奏奉

俞旨將使臣齎咨官所帶貨物免稅自應遵辦紅襍稅既偏重商民苦累亦應酌減經臣咨會奉天轉飭東邊道查明妥細擬議並咨總理衙門查核旋准總理衙門奏稱朝鮮恪修職貢自宜量加體恤應由臣與奉天將軍府尹詳細酌核奏明辦理等因復經臣咨函商准將軍臣慶裕飭查擬議咨請察核會奏前來臣就奉

天來咨現擬減免各節查照光緒八年禮部原奏欽奉

諭旨並東邊道原訂章程核對釐訂查得從前朝鮮貨物均搭附貢使隨行別無商販每將商貨混入貢使行李之內中江稅課未

充是以前道陳本植議章較嚴今稅收不但無絀且較舊額增至  
十倍有餘可見商販並未混冒該使臣等長途遠涉費維艱自  
應變通辦理酌量蠲徵用示寬大應請嗣後朝鮮貢使由陸路至  
京所帶行李零星貨物概行免稅毋庸核計斤數其差官從人所  
帶紅襪行李零星貨物均照原訂章程加增一倍每員名原准帶  
紅襪二十斤十斤者改爲四十斤二十斤原准帶行李零星貨物  
一百六十斤八十斤者改爲三百二十斤一百六十斤另有包裹  
係屏帳籠重途中食物仍照原訂章程准予免稅此外如有附帶  
商貨應照則納稅以杜包攬偷漏之弊近來該國別有齎奏咨官  
由陸路來京津聲請代奏事件其情事與貢使相同並應欽遵  
諭旨將其行李貨物與貢使一體免稅其隨行差官從人查照現  
定斤數辦理仍各以報部員名實數爲限此外別項公務差官往

來如有攜帶貨物應照則納稅又貢使及齋奏咨官回國按禮部  
則例本有外國貢使回國帶去貨物俱停其稅及朝鮮人出入山  
海關驗明印文割付免稅之條是以該國王來咨請照舊章免回  
貨之稅今議使臣及齋奏咨官等由陸路回國所帶貨物如係在  
京購買並非在奉省包攬有禮部公文可據者不限數目概予免  
稅至朝鮮土產稅課半賴紅蓂若因稅重滯銷轉非字小之義自  
應將紅蓂稅減爲值百抽十據東邊道聲稱九連城應徵釐金輸  
自內地商人與朝鮮無涉應照舊向內地商人徵收惟李應浚所  
稱加秤頭加平色等項本非章程所有應卽永遠革除不准局卡  
胥役於正稅外絲毫需索伏惟

朝廷撫綏藩服向與各國體例不同況朝鮮貧弱已久近復變  
亂相尋官民疾苦誠如禮部前奏准其商民交易所以優加體恤

非爲推擴利權起見今就原訂稅章量予減免仍明定限制於稅收不致大損庶以維典禮而示懷柔理合會同

盛京將軍臣慶裕奉天府尹臣裕長恭摺具陳伏乞

皇太后

皇上聖鑒訓示施行再吉林與朝鮮邊民交易事同一律其紅蔴減稅一條俟奉准後再由臣知照吉林將軍一體查照辦理理合

聲明謹

奏

淮軍報銷摺

光緒十一年十二月十三日

奏爲淮軍收支款目自光緒十年正月起到十二月底止遵章列爲第十三案造冊報銷恭摺仰祈

聖鑒事竊照淮軍收支款項業經截至光緒九年十二月底止列爲第十二案報銷於光緒十年十二月初一日具

奏奉

旨該部知道單併發欽此並經循例造冊送部接准部覆按冊核銷在案伏查十年分淮軍分駐直隸沿海各口要地並奉天旅順口共原部馬步水師四十營又援護朝鮮留防該處及調回奉天

金州駐紮親慶共六營又因海防喫緊先後

奏准添募津勝盛仁拱衛新軍共十九營並原有水陸各哨棚與護運餉械弁勇統歸淮軍案內分別造冊彙總請銷今自光緒十

年正月起截至是年十二月底止列爲第十三案所有營哨官弁員名勇夫開收總數征防處所先經造冊分咨軍機處暨戶兵工部備查又將支給正雜款項增裁數目遵照新章每三箇月開報一次亦已截至光緒十年年底止季報清冊先後咨送各部查核以上淮軍原募續添馬步水師各營並隨營辦事支應等差文武官弁親兵勇夫薪費口糧倒補馬匹柴薪車價駝騾喂養卹賞水陸轉運腳價夫工采製軍裝器械油艙船隻經費正雜各款均循前案楚軍營制與

奏定章程及准銷例案分別截清起止概按湘平折實庫平接續造報飭據淮軍報銷局司道逐款清釐查核舊管並新收川鄂江蘇等省協餉兩淮鹽釐部撥專餉同本案扣存轉運采製一分平餘收歸軍火還價奉刪繳回各款除登除及附銷外實計收用銀

三百三十九萬六千四百五十四兩五錢有奇開除正雜各款遵照部議酌定軍需報銷章程各歸各部核銷計應歸戶部核銷銀二百二十四萬九千十六兩有奇應歸兵部核銷銀三萬六千五百二十九兩一錢有奇應歸工部核銷銀九萬八千五百六兩三錢有奇統共請銷銀二百三十八萬四千五十一兩四錢有奇應存銀一百一萬二千四百三兩一錢有奇已接支光緒十一年正月起馬步水師營哨正雜餉項並購製外洋軍火器械工價預儲軍米等用歸於後案舊管項下滾接造報等情具詳請

奏前來臣查十年分淮軍分駐直隸大沽至山海關各海口拱衛畿輔以固根本重地又調親兵慶字等營遠戍朝鮮保護屬邦並於奉天金州旅順口屯兵堅築礮臺分投布置適值法事決裂屢次聲言北犯海防喫緊督飭各軍嚴備戰守餉需實屬重要歷屆

報銷案內截存銀兩皆係竭力設法節縮並將月餉酌量緩欠以備緩急之需乃上年各省自辦海防遂致應解淮餉減少且有積欠絲毫不解之處而應發餉項既繁又須巨款添購器械預儲軍米現計存款已動放殆盡新募各營業經裁撤部款停止此後如來源日絀恐難爲繼惟有隨時諄催各省按照額數報解冀可周轉所有造報光緒十年正雜款項逐款查核均係循照歷辦成案摺節支發實用實銷並無絲毫浮冒除將收支各款分造細冊咨送各部核銷併飭將以後用款接續清理造報外理合專摺具陳併繕簡明清單恭呈

御覽伏乞

皇太后

皇上聖鑒謹



奏

軍需交涉洋務片

光緒十一年十二月十三日

再准軍海防各營洋鎗礮隊教習通事人等辛工礮費輪船薪糧並購買外洋軍火價値運解礮火輪船水腳及天津行營機器製造局委員人等薪糧公費工匠工食料物購價等項多與洋人交涉均屬無例可循至操練後膛洋礮拉礮車馬喂養夫工係照奏明章程同例補馬匹例價分別核實支給已截至光緒九年十二月底止附片

奏銷在案此次造報光緒十年正月起截至是年十二月底止第十三案內前項各款並修整洋鎗經費遵照新章將增裁支用數目彙入季報清冊先後咨部茲據該司道等撥款覆加查核係照案接續支給並奉文飭發均無浮冒遵飭各歸各部核銷計應歸戶部核銷教習辛工中外人等薪糧公費拉礮馱運車馬喂養等

銀七萬八千七百三十五兩六錢有奇應歸兵部核銷輪船薪糧  
夫工船價運腳保險費倒補馬價等銀三萬二千三百十九兩二  
錢有奇應歸工部核銷油飾小修礮費匠工購製外洋軍火料物  
價值等銀十七萬二千九百九十七兩有奇共計請銷銀二十八  
萬四千五十一兩九錢有奇照案分晰片造支銷細冊詳請附  
奏前來臣查前項各營洋鎗礮隊教習通事工匠人等辛工購買  
物料洋軍火價值運腳各款多與洋人交涉無例可循仍應查照  
歷屆成案據實請銷除將細冊咨送總理衙門戶兵工部核銷外  
伏乞

聖鑒謹附片具

奏

更換汽機鍋爐片

光緒十一年十二月十三日

再天津行營製造局機器廠汽機鍋爐二具前因設用年久已皆鏽蝕朽爛亟應更換免誤要工業將估需工料銀數照章先行咨部立案嗣准部覆應俟工竣專案造報其水師修製各船工料用數亦應專案造報等因當經轉行遵照茲據淮軍報銷局司道詳稱更換汽機鍋爐二具並修整師船十號應需經費數目已隨時聲明列入十年分季冊報部其計請銷銀四千四百三十一兩三錢有奇委係實用實銷並無浮圖詳請具

奏前來臣覆核無異除將送到清冊分咨戶工部核銷外伏乞

聖鑒謹附片具

奏

淀地分別徵糧片

光緒十一年十二月十三日

再東淀水道清理完竣將無甚礙水業經佔墾之地水小之年仍准墾種歲收租息以爲堡船經費於淀中撈泥挖淺已經

奏報在案其靜海縣南北兩泊亦被民間佔墾因與東淀連界糾

葛前飭道員金福曾等一律清理茲據金福曾會同天津道萬培

因詳稱查明南北兩泊已墾地畝東至南運河西至子牙河南自

大城縣交界之大六分起北至天津縣交界之埕坨嘴止除留出

水道並原有糧額者就糧核地外計無糧地二百七十三頃八十

四畝六分照東淀之案水小之年暫准墾種每畝議徵租息銀三

分共徵銀八百二十一兩五錢三分八釐自光緒十二年起徵併

充東淀堡船經費如遇災歉亦照安州淀地成案勘明分別酌減

緩徵取造圖冊具詳前來臣覆核無異除圖冊送部外理合附片

具陳伏乞

聖鑒敕部查照謹

奏

楊宗濂總理武備學堂片

光緒十一年十二月十三日

再天津仿照西法創設武備學堂經臣奏蒙

旨准並欽奉

寄諭許爲當務之急仰見

聖明俯采芻論因時制宜莫名欽佩當此經費支絀事力求節  
尙一切用款非綜覈得人無以杜虛糜之弊且堂中學生均係挑  
選各營弁目其中固多精健聰穎之才而勇敢性成亦往往好逞  
血氣所募德國兵官分充教帥性情不一勤惰各殊必須威信素  
孚之員督率駕馭方可收馴習之效查有已革湖北簡用道楊宗  
瀛心細才長器識深穩自同治初年隨臣勦辦粵捻久在前敵總  
理營務勞勩卓著深得兵心歷年隨辦交涉操縱有方以之總理  
學堂事宜弁兵心悅誠服如父兄詔勉子弟自能日起有功卽西

洋教習各弁亦能謹受約束臣以事屬創舉襄助需才札調該員  
來津責令會同津海關道周馥等妥細籌酌樽節用款務求實濟  
深資得力理合附片陳明伏乞

聖鑒謹

奏



保定設電綫片

光緒十一年十二月二十日

再臣駐紮天津籌辦海防洋務距省較遠司道等稟商地方緊要事件文牘往返需時自應接設電綫且遇臣回省之際凡一切海防洋務尤必有電綫傳遞以期聲息靈通軍情無誤惟天津至保定僻路向非商道通衢商報極少須照章籌撥公款作為官綫並給常年用費始能集事飭據保定練餉局司道會同總辦電報道員盛宣懷等籌購料物揀派熟悉華洋員匠勘路興辦自本年八月開工由天津靜海大城文安霸州雄縣安州容城安肅清苑各境以達省城計程三百數十里已於九月二十四日工竣通報統計料物價腳栽桿安綫設局並添蓋局房製備傢具等項共用銀一萬九千一百餘兩由練餉項下陸續撥發據該司道等具詳前來臣覆查無異除將動用經費及常年用款飭令分晰核實造報

外理台附片陳明伏乞

聖鑒敕部查照謹

奏

清理東淀請獎片

光緒十一年十二月二十日

再前因東淀久被侵種節節壅滯上游各河水難下洩遂致泛溢  
爲災經臣飭委分發直隸補川道金福曾會同天津道督飭印委  
認真清理已將有礙水道處所復歸於淀訂立界址永遠不准侵  
種其無甚礙水業經佔墾之地水小之年仍准墾種令於地中開  
挖溝渠使水流貫酌收租息以爲治淀經費奏報在案查此項淀  
地承百數十年積弊之後紛紜膠轕頭緒極繁自光緒七年開辦  
起屢有豪強希圖隱佔百計阻撓辦理甚爲棘手在事員紳於辛  
苦艱難之際胼胝經營力任怨厯時五年之久卒使全淀水道  
不爲涇沒並以租息設堡船六十隻奴夫一百二十名凡淀身淤  
滯者落之卒蠶礙水者芟之從此逐漸疏導脈絡貫通可期上游  
七十二澗之來源流行下注其查出該淀及靜海南北泊無糧地

一千一百餘頃。歲可得治淀經費銀二千九百餘兩。洵於除害中兼能興利。按部定查地獎章。如能查出黑地百頃以上。准請優獎。今已至于千頃以上。且清理東淀有裨水道大局。據天津道萬培因補川道金福會稟請給獎。前來謹照章擇尤擬保數人繕單恭呈御覽。仰懇

天恩俯准照擬給獎。以示鼓勵。理合附片具陳。伏乞

聖鑒訓示。謹

奏

海防練軍收支請銷冊摺

光緒十一年十二月二十日

奏爲查明天津原有海防練軍光緒十年分收支各款照章造冊請銷恭摺仰祈

聖鑒事竊據天津支應局司道詳稱津郡練軍及大沽葛沽北塘各礮臺防營並雲字營馬隊營務處小隊應需餉項向由津海關六成洋稅招商局稅洋藥釐捐東海關協餉長蘆鹽斤復價正雜課各項隨時籌撥按照海防章程並直隸練軍營制摺節支放所有光緒九年分收支款目業經奏咨准銷在案查十年分增改各款前已分別專案彙單咨部立案核覆其應支餉乾等項並大沽等處礮位經費以及設局辦公租賃民房添置帳棚旗幟號褂采買製造軍火器械暨一切支發款項悉照奏定章程歷年海防准銷成案核實摺節支放造具細數清冊詳請奏咨前來臣逐加覆

核計自光緒十年正月初一日起至年底止係有閏之年舊管歷  
屆奉部核准墊支不敷銀二萬一千一百七十八兩九錢四分七  
釐五毫九絲七忽新收各款並本案內扣收平餘共銀四十一萬  
四千九百九兩一錢六分四釐四毫三絲一忽六微其支款應歸  
戶部核銷銀三十六萬三千一百二十三兩六錢三分二釐八毫  
三絲六忽三微應歸工部核銷銀三萬五千五百八十八兩五錢四  
分三釐一毫六絲四忽二微共應核銷銀三十九萬八千七百四  
兩一錢七分六釐五微並撥還舊管項下墊支不敷銀兩外計仍  
墊支不敷銀四千九百七十三兩九錢五分九釐一毫六絲五忽  
九微列入下屆報銷滾接造報除清冊咨部外所有光緒十年天  
津海防練軍收支餉銀造冊請銷緣由理合恭摺具

奏伏乞

皇太后

皇上聖敕部核銷謹

奏

李文忠公奏稿卷五十五